

明下竹文選

卷之四
竹文選

清季外交史料卷十九

光緒六年正月至二月

目錄

禮親王世鐸等奏軍機處等會議崇厚與俄所訂約章專條窒礙難行請遣使前往轉圜摺附懿旨正月初十日

大清國大皇帝致俄國聲明崇厚所議條約違訓越權窒礙難行國

書正月初十日

少詹寶廷奏使事宜慎請飭曾紀澤來京請訓摺正月初十日

庶吉士樊增祥奏崇厚使俄違訓越權請亟正典刑摺正月十七日

禮親王世鐸等奏曾紀澤使俄議約應隨時請旨遵行片

正月二十一日

旨寄左宗棠李鴻章曾國荃劉坤一等伊犁事俄國多所要求着籌

備防務計七件正月二十一日

諭出使俄國大臣崇厚着定爲斬監候正月二十三日

諭曾紀澤到俄後必須力持定見妥慎辦理以全大局二月初一日

川督丁寶楨奏伊犁事件關係大局自請赴俄交涉摺二月初四日

總署奏巴西遣使來華議約請飭南北洋大臣會商摺二月十四日

總署奏與德國議修條約請旨派全權大臣摺二月十四日

塔爾哈巴臺參贊錫綸奏密陳應付俄邊機宜摺二月十四日

塔爾哈巴臺參贊錫綸奏統籌辦理接收伊犁事宜片二月十四日

川督丁寶楨奏俄約多不能准請籌東北邊防片附上諭二月十七日

司經局洗馬張之洞奏謹議改使改約辦法片二月二十一日

司經局洗馬張之洞奏請改致俄國國書詞句片二月二十一日

總署奏俄國分界通商各事經審訂簽注擬議辦法摺附簽注條約陸

路通商章程專條附議專條及約章總論二月二十二日

清季外交史料卷十九

黃巖弢夫王彥威輯

男希隱亮編

孫孝章敬立校

禮親王世鐸等奏軍機處等會議崇厚與俄所訂約章

專條窒礙難行請遣使前往轉圜摺

附懿旨

禮親王世鐸奏爲遵旨會議具奏事光緒五年十二月初十日欽奉懿旨前有旨將崇厚所議條約章程及總理衙門迭次所奏各摺交大學士六部九卿翰詹科道妥議具奏茲據大學士等遵議覆奏各摺片着一併交親郡王御前大臣軍機大臣總理各國事務王大臣大學士六

部都察院堂官再行詳細妥議具奏醇親王亦一併會議具奏十三十四十五等日軍機大臣先後面奉諭旨肅親王隆勳檢討周冠御史李蟠洗馬張之洞等各摺片着交會議之王大臣等一併議奏各等因欽此臣等公同查閱各摺片雖措詞不同而用意不外崇厚所定約章事條不可許並應治崇厚之罪籌戰守之策三端除崇厚應得罪名已於十二月十六日欽奉諭旨交刑部治罪應俟刑部定擬具奏時恭候宸斷其戰守事宜容臣等詳細妥籌另摺具奏外至崇厚在俄國定議約章專條各件內界務一節總理衙門迭次具奏均聲明有礙全局必不可許等語自是不能照議償款一節係爲還俄國代收代守伊犁兵費並補卹在中國境內被搶受虧俄商及被害俄民家屬等款俄國如允

還伊犁全境似可照辦現亦無庸置議商務一節有循照舊約者有仿照各國總例者皆俄國與各國約章所已行此外如設領事開行棧推廣運貨地於西路北路西安漢中等處大半皆俄國使臣布策在京辯論多年求而未得之款若允照辦轆轤正多流弊滋大且礙華商生計總理衙門前亦奏明在案松花江行船載在愛琿條約至伯都訥販運各貨則逾邊界百里內限制實爲舊章所無應與通商各條均請無庸置議緣俄國與崇厚所議各節先以交收伊犁爲詞並因修約屆期肆意要求冀得飽其所欲崇厚墮其術中率與定議畫押此時若將界務不能照議償款無可再議通商各條分別准駁照會其駐京使臣揆諸事理無論其不能就範也且現在俄國駐京之凱陽德係署理使臣亦

無辦此事之權中國署出使大臣道員邵友濂駐紮俄京權分較輕又未必能與俄國外部商辦事件臣等再四熟商此次崇厚本在俄京與其外部定議現既不能照議可否另行遣使前往將崇厚所定約章專條如何違訓越權及中國內外大小臣工不能議准緣因斟酌理與俄國君臣剴切言之其是否願與再商或允再商而仍多要挾雖均難以逆料惟就刻下情形而論似以遣使前往較爲得體且在我既屬情理兼盡在彼或可以藉此轉圜如蒙俞允應請特簡熟悉洋務大臣一員親齎國書前往俄國將此事窒礙原委詳細剖辯無論以後伊犁允否交還總不得輕率定議再爲貽誤再洗馬張之洞亦於二十六日遵旨赴總理衙門將各摺件閱訖臣等並將現在擬辦情形與之會商意

見大致相同惟另行遣使一層據稱似可稍緩先由署理出使大臣邵友濂將未能照准緣由向其外部轉達察看情形再行斟酌辦理謹奏光緒六年正月初十日奉懿旨崇厚所議條約章程違訓越權經王大臣等會議意見相同其大小臣工所奏均稱事多窒礙着曾紀澤前往再行商辦一切妥慎將事又奉上諭一等毅勇侯大理寺少卿曾紀澤著派充出使俄國欽差大臣

大清國大皇帝致俄國聲明崇厚所議條約違訓越權
窒礙難行國書

大清國大皇帝問大俄國大皇帝好朕誕膺天命寅紹丕基眷念友邦言歸於好曩者朕特簡吏部左侍郎崇厚爲全權大臣出使貴國面諭

以如何商議一切事宜乃崇厚在貴國所議條約章程專條各款朕親加校閱多有違訓越權之處並經內外大小臣工一再會商妥議僉謂事多窒礙難行朕深爲惋惜第念兩國和好二百餘年朕恐大皇帝因此或疑中國有渝和好之意是以再行特簡一等毅勇侯大理寺少卿曾紀澤爲出使貴國欽差大臣親齎國書代達衷曲以爲真心和好之據並將前議各款窒礙難行原委分別縷陳卽希大皇帝派員與該大臣和衷商辦朕知曾紀澤和平通達熟悉中外交涉事件務望推誠相信俾盡厥職以永敦睦誼共享昇平諒必同深慶幸焉光緒六年正月初十日

少詹寶廷奏使事宜慎請飭曾紀澤來京請訓摺

詹事府少詹事宗室寶廷奏爲使事宜慎請將國書及改議條約仍飭會議王大臣公同酌擬事竊本月初三日奉懿旨派曾紀澤前往俄國將應辦事件再行商辦曾紀澤爲人奴才夙未深知今奉命使俄是否由英徑達俄國抑仍來京請訓懿旨未經明白宣示奴才竊以爲出使之命不可太遲而使臣赴俄則不必太速崇厚之約荒謬卽因遣使不慎一之爲甚斷不可再應令來京請訓謀定而往庶免有誤若但寄諭使臣俾其商辦朝廷深意使臣未必深知設復違訓越權誅不勝誅改不勝改事同兒戲必激之使和而後已或謂曾紀澤由英回京由京赴俄周折太多時日太緩不知中國邊備非倉卒所能修成使臣往議正以稍緩爲妙事關重大不厭求詳總理衙門王大臣不過數人情形雖

稱熟悉謀畫恐有未周似不若參以衆議較爲周匝總理衙門辦事素喜祕密措詞素喜游移貽誤如此應知改計恭親王小心謹慎不敢稍有專擅當此大事必樂於集思廣益有裨國家擬請旨將此次國書應如何撰擬條約應如何駁改仍飭會議王大臣等會同總理衙門詳慎酌擬奏明恭候裁定如飭曾紀澤來京面授大略固爲妥善若恐遲延貽誤事機逕令由英赴俄則必當詳切寄諭嚴飭恪遵辦理併慎選精明公正之員與會議王大臣總理衙門商議明確面承聖訓恭齎國書寄諭往交曾紀澤祇領隨同參贊匡其不逮仍飭曾紀澤隨時請旨不得專擅總理衙門寄信時亦不得含混其詞致使臣得以藉口將來改約定盟諸臻妥協則總理衙門與該使臣同功設因草率貽誤總理衙

門與該使臣同罪庶下無違訓越權之弊上收安邊息民之效矣謹奏
光緒六年正月初十日奉旨

庶吉士樊增祥奏崇厚使俄違訓越權請亟正典刑摺

翰林院庶吉士樊增祥奏爲使臣罪無可逭請亟正典刑以儆行人而
謝敵國事竊臣伏見崇厚使俄違訓越權經廷臣交劾逮繫論罪昨讀
邸鈔已欽派大理寺少卿曾紀澤往俄另行商辦又以崇厚情節重大
特命親王大臣部院堂官會同定擬仰見皇太后皇上誅罪殛奸至明
至斷夫條約旣煩更定則訂約之人不得不誅行人苟可不誅則所定
之約不能不許勢無中立事無兩全會議諸臣旣知條約之萬不可許
卽知崇厚之萬不能生蓋外國之所謂違訓卽違悖詔旨之謂也外國

之所謂越權卽專擅誤國之謂也往者耆英之獄成憲昭然而況崇厚目無君父貽害國家其罪甚於耆英百倍有臣若此除論斬之外本無他條可援而臣猶虞其未決者則以崇厚自辦夷務以來於通商各國百端取媚我朝雖以爲罪而外國皆利其奸一旦加誅不惟俄人不平卽他國亦必爲之稱枉恐王大臣瞻顧全局議罪不免從輕臣以爲苟出於此則是褻上國之天威隳臣民之銳志使俄人益得有辭而曾紀澤無從另議留一至愚極庸忘君媚敵之崇厚而撓國憲啟戎心卒使新約歸於必行狡謀終於得遂此忠臣志士所爲先事寒心者也夫曾紀澤雖曾國藩之子而韓門出絳張氏生均平日傾心泰西吐棄周孔過庭之誠掃地無餘此次朝廷簡命不過謂其於彼中語言文字粗能

通曉又奉使歐洲赴俄較近論其讀書嗜古容非安心賣國者流特其
見解既偏總謂西人百倍於中朝西法遠踰乎孔教充此一念雖使腹
地徧布洋商邊陲盡爲俄有彼將視爲固然而不復與之爭論此其爲
害何可勝言故崇厚不卽加誅則曾紀澤以爲得罪於俄國恐遭非禮
之侵凌得罪於本國轉有倖逃之法網是使俄國得一忠臣爲崇厚添
一護法其於國事究竟何裨況崇厚一誤可令曾紀澤往若曾紀澤再
誤庸可再更再講乎欲令曾紀澤使不辱命惟殺崇厚足以儆之欲俄
人不執前議亦惟殺崇厚足以謝之不特此也崇厚所許各條約中國
臣民共知其謬彼雖不慧亦何至全無心肝所以敢於違悖敢於專擅
者誠見今之大勢以夷務爲急凡涉通商換約事宜但有隱忍遷就之